

Biografía di Hyacinto Victoriano Giel (Casin)

Hyacinto Victoriano Giel a nace dia 9 di maart 1945. Casin su nomber artistico ta Casinger. Su mama yama Imelda y su tata Jozef. El a nace den e barío di Boegeroei na Noord. E tin diescinco ruman, dos a fayece. Casin ta net memey di e rumannan, number ocho. E ta casa cu Sra. Berta Erasmus. Nan a casa na aña 1972 y nan tin tres yiu. Esun mas grandi yama Giarzinio, di dos yama Ryan y e di tres yama Shayenne. Mayoria di Casin su rumannan ta musical. Esnan mas conoci ta Tica y Bencho Giel. Su otro rumannan por toca un poco y mayoria ruman muhernan a canta den coro di misa tambe.



Casin a considera e bida artistico nada mas cu un hobby

**Segun Casin,
musica bo mester
sintie den bo
curazon**

Semper Casin a uza e musica como hobby. E tabatin su trabou y cu e musica tin ora e ta relaha un poco. Pero musica, bo mester sintie den bo curason y como parti di disciplina ta algo di bo e ta. Si bo ta un musico, e ta algo di bo cu bo ta nace cune.

E bida artistico

Casin a cuminsa toca guitarra for di edad hopi jong. El a cuminsa canta cu e guitarra y despues el a canta hopi pa amigonan rond y hopi biaha pa “moonlight party” tambe. E ta gusta un guitarra. Ora e yega atardi for di trabou, e mester coy e guitarra y canta. Casin tabata canta hopi ranchera y bolero. Y despues di poco tempo, su ruman homber Nino a dicidi cu nan ta bay forma un banda. Nan a forma un banda y e tempo ey tambe tabata

banda The Boy Scouts di su ruman Bencho, hunto cu Tino Ruiz. Nino y Casin a dicidi di forma un banda, cu guitarra, conga, etc. Casin a logra cumpra un piano pa dos shen florin y el a pone den su camber na cas. Mientrastanto niun hende sa cu Casin ta practica riba e piano. Su ruman so, pasobra ta e mes a yuda Casin carg’e. E tabata forma parti di Ecos del Caribe. Anto e piesanan cu Ecos del Caribe tabata toca, Casin tabata canta so.

E tabata fula e piesa nan. El a cuminsa bay les cerca un señora, casa cu un futbolista di Colombia. Despues Casin a bay les na Cas di Cultura. Pero e no por a bay hopi les, pa largo tempo, pa motibo cu a yega e momento cu nan a forma un otro banda cu yama Vibracion 74 cu Juancho Kock. Anto el a bay toca piano y canta. Casin a keda semper practica riba su mes.

**Niun hende
tabata sa cu
Casin tabata
practica piano
den su camber
na cas.
Solamente su
ruman
homber.**

Dedicacion y estilo musical

Segun Casin ora bo ta den banda musical bo tin cu ensaya na cas den caso cu bo no ta lesa partitura di musica.

Casin no ta considera su mes un especialista. E por toca guitarra, cuatro y piano. Pero e no ta sinti cu e ta un especialista riba piano. Ora bo ta den un banda musical, bo tin cu ensaya na cas, den caso cu bo no ta lesa partitura etc., bo tin cu ensaya duro pa diamars of diahuebs bo ta bon prepara pa ensayo general cu e banda completo. Den e banda aki Casin tabata toca guitarra y canta. Nan a form'e y despues na lugha di guitarra a bin piano. E banda tabata yama Super Combo Casino. E tempo ey bo tabata toca cu piano di palo, pues piano acustico. No tabata existi ainda e piano di coriente. Ora di pauze, semper Casin ta bay sinta na e piano. E ta mishi cu e piano y door cu Casin conoce guitarra, e tin e parti di harmonia un poco. Despues el a cumpra un piano. E tempo ey e tabata hunga basketball, anto nan tabata hunga na Club Aruba Juniors. El a mira un piano den huki cu no tabata den uzo y el a cumpr'e. El a dedica na tur ritmo. Especialmente riba tumba el a traha hopi.

Despues el a bira un baladista cu hopi ora di dedicacion. Ora Casin ta compone, su so ta hacie. Ora di Tumba Festival, ensayonan normalmente ta dura podise dos siman largo. Si bo ta hopi cerca di e fecha cu e festival ta bay tuma lugha, ta bira cu tin ora podise bo ta pone algun ora acerca pa ensayo. Tin ora hasta bo ta ensaya diasabra mainta, repas'e hopi bon, pa bo estren'e anochi. Casin tabata e prome Rey di Tumba di Aruba su Carnaval na 1971.



Casin Giel prome Rey di Tumba na 1971.

Desaroyo musical

E piano a pone Casin sigui desaroya den musica, pasobra a yega un momento cu e pianista cu tabata toca cu nan den Vibracion 74 a bay! El a bay toca na hotel y nan a keda sin pianista! Casin mes a bula riba e piano, anto nan a bay busca brass pa pone den e banda, anto asina el a keda desaroya un poco mas riba e piano. Pero, e guitarra tabata di su ruman. E tempo aya nan tabata bende un guitarra di mas of menos

binti florin. Ora cu e ruman no tabat'ey, Casin tabata mishi cune. Den comienso e tabata un poco dificil, pero dor di su entusiasmo y interes cu e tabatin y ki ora Casin mira un hende toca guitarra, e ta bay pa e mira con e ta pone su dedenan. Casin ta pensa cu e tin e sentimiento y e tin un tiki cualidad musical. E ta sintie! Casin a bira un compositor, kiermen e ta sinti cu e tin e parti special aki den su curpa.



Casin su entusiasmo y interes

Algun grupo musical cu el a forma parti di nan.



Banda Triple S

E prome banda cu Casin a cuminsa toca cune, tabata Super Combo Casino. Despues el a bay milita den Ecos del Caribe. Casin a bay den Vibracion 74, despues den Triple S. El a forma parti di Papito y su Doble Sabor. Djey el a toca pa Vicente Kelly y Los Pimentosos. Por ultimo Casin a lanta su mes un banda Casinger Sweet Band.



Banda Super Combo Casino

E parti internacional

Casin a yega di participa den bandanan na Corsou, Boneiro, Venezuela, Hulanda, Miami Florida y Republica Dominicana. Tin ora pa bo presenta afo, no ta simplemente b'a busca contracto. Bo ta haya un contracto, dor cu bo tin cierto cancionnan bon pega. Anto bo ta wordo hopi menciona, den e caso ey. Por ehempel, e piesa cu yama *Manolo* a hiba nan diferente caminda. Nan tabata tin un tour cu Doble R na Hulanda durante un luna largo. Algo inolvidable pa Casin ta cu el a canta y toca su guitarra durante clausura di un curso na Japon. Casin a canta Himno di Aruba, Abo So, un composicion di Juan Chabaya Lampe (Padu) y un cancion especialmente compone pa e compania "Nissan Motor Co.



Casin su presentacion durante un curso na Japon

Sugerencia pa futuro generacion

Casin a tuma nota cu mester bin un sistema pa por crea musiconan hoben. Tin un problema cu actualmente e hobennan no ta interesa den musica! Ora cu e bieunan bay, ora otro pianista bay, ken ta bin? Nan no ta mira esey. Casin no sa con mester haci esaki. Si por ehempel ta na scol basico mester start dinobo cune? Pasobra un tempo e tabata na scol! Bo ta corda tempo di frèr Alexius, ta tur musico a bin fo'i dje! Anto mester forma e scolnan ey di nobo den bario pa bo crea musico, pa bo crea compositor tambe! Pasobra si bo no tin compositor, no tin cancion! Esey ta un manera cu mester busca pa yega na dje! Pa nos forma musico! Pa muchanan por lanta cu amor pa e arte musical.

Mi sa cu composicion ta un arte! Algo cu bo ta nace cu ne! Nos mester por yuda nos muchanan bira compositor, pa asina traha propio composicion . Tambe tin un scarsedad na bon musico. Casin kier a pidi pa muchanan purba dedica na un instrumento musical. Practica deporte tambe ta un hopi bon escogencia. Pero si bo por, si bo tin un tiki talento y cu ayudo y apoyo di e mayornan, cumpra un instrumento musical y pone na cas. Wak si e mucha por desaroya riba e tereno aki y gust'e pa despues e por trece alegria den cas pa henter famia. Tur esaki ta yuda hisa e nivel cultural musical di nos isla Aruba.



Papito y su Doble Sabor



Casin durante workshop di musica na diferente Scol